

umpamanya sejenak. Atas ketibaan baginda itu sekali lagi kita mengucapkan *Ahlan wasahlan wa marhaban bi al-Mulk al-Karim*.

* * *

Kita orang Melayu dan Perkembangan-perkembangan Masa Akan Datang.

Melayu menuju kepada kemerdekaannya setahun lagi. Ucapan-ucapan dan janji-janji telah diberi kepada orang-orang Melayu untuk menaung dan membolehkan orang-orang Melayu berdiri sendiri dan akan membuat segala usaha-usaha Melayu itu supaya maju bergerak dan mara.

Kalau kita tidak khilaf Dr Ismail Menteri Perniagaan dan Perusahaan di dalam salah satu ucapannya mengatakan bahawa hendaklah sekalian orang-orang Melayu merebut peluang-peluang yang terbuka supaya dapat mereka bergerak dan maju bersaing bersama-sama dengan bangsa-bangsa asing di negeri ini.

Segala peluang yang diberikan kepada orang-orang Melayu itu hendaklah diterima dan disambut dan janganlah tatkala menyambut itu orang-orang Melayu bersifat "mahu diberi makan disudukan lagi" oleh orang lain dalam menghadapi perkembangan ini sebagaimana yang disebut oleh orang-orang Cina.

Kita, dengan kata-kata itu, patut berasa malu dan insaf bahawa sejak dari dahulu lagi tiap-tiap apa pun juga yang akan kita hadapi selalu kita meminta, cuma meminta dan meminta sama ada kepada orang atau kepada kerajaan untuk menyelenggarakan tiap-tiap sesuatu yang berkenaan dengan kita.

Menurut pelajaran Islam meminta itu adalah merendahkan kedudukan dan meminta itu menjadikan seseorang itu tertakluk kepada orang lain kerana menerima budinya dan ia walau bagaimana pun

tidak dapat mengangkat kepalanya – sentiasa tunduk kepada orang yang telah berbudi kepadanya itu. Islam sangat mencela langkah-langkah sedemikian ini dan kerana itulah Islam menganjurkan supaya percaya kepada diri sendiri, yakin kepada usaha sendiri dan kerana itulah Islam menganjurkan tiap-tiap orang kita, tiap-tiap usaha kita, dihidupkan dengan cukup kemahuan, dengan tenaga, dengan kebolehan dan dengan kesungguhan dan keyakinan, dan menjauhkan di dalam berusaha itu sifat berangan-angan dan bersenang-senang diri sebagaimana yang pernah dan biasa dibuat oleh tiap-tiap orang, oleh tiap-tiap kebanyakan kita di dalam perusahaan-perusahaan yang apabila mendapat sedikit kelebihan menumpahkan segala-galanya untuk kesenangan diri dan membuat kerja-kerja yang *'āṣī*.

Kita telah melihat di hadapan mata kita, harta benda yang ditinggalkan bermilion-milion oleh orang tua kita apabila jatuh kepada anaknya harta itu tidak bertambah naik tetapi merosot turun dan pupus dan akhirnya sudah barang tentu papa sedang disebalik itu bangsa-bangsa asing hidup mewah, hidup maju merebut kedudukan ekonomi kita, lihat di Singapura! Yang termasyhur dahulu kekayaan adalah di tangan orang-orang Islam; lihat di Ibu Persekutuan Tanah Melayu kekayaan dahulu terletak di dalam tangan orang Islam! Tetapi sekarang lepas satu, satu terjual, tergadai dan seumpamanya. Kerana anak cucu mereka itu tidak tahu mengembangkan, tidak tahu meninggikan, membesarkan apa yang ditinggalkan pada mereka, yang tahu hanya menghabiskan dengan perbuatan-perbuatan *'aṣī* mengikut nafsu dan tidak ada usaha-usaha untuk dijalankan.

Daripada contoh-contoh ini hendaklah orang-orang kita menginsafi dan mengambil tauladan kepada perusahaan di seluruh Tanah Melayu yang telah diberikan dengan modal

yang sekecil-kecilnya tetapi telah berjaya, maju ke tengah
bersaing dengan bangsa-bangsa yang lain, bersaing dengan orang lain,
yang dapat disempurnakan oleh mereka tidak lain oleh
kerana cekal, bersungguh-sungguh, berusaha, rajin, tulus
ikhlas akhirnya bertawakal kepada Allah tentang soalan dan
pendapatan-pendapatan mereka dan berusaha supaya tidak membezakan
wang kepada jalan-jalan yang *‘āṣi*. Dengan tidak ada kecekalan
dan kesungguhan serta tidak percaya kepada diri dan
tenaga sendiri, kepada usaha sendiri tidak akan
didapat segala sesuatu itu maju dan

kita tidak akan dapat merebut
peluang-peluang yang dibukakan oleh pemerintah kita yang ada
sekarang kerana kebolehan dan tanggungjawab kita
kepada sesuatu itu tidak ada. Kerana itu waihai
umat Melayu, ingatlah! Berusaha dan bertenagalah supaya
percaya pada diri sendiri, tekun dalam perusahaan,
cekal di dalam menghadapi sesuatu, tabah di dalam
menghadapi sesuatu perbicaraan dan dengan demikian
itulah sahaja akan dapat merebut peluang-peluang yang ada – kalau
tidak kita akan melumur telunjuk.

////////// AL-MALIK SAUD KE INDONESIA //////////

Menurut akhbar “Indonesia Raya” bahawa Al-Malik Saud Raja Saudi Arabia akan tiba di Jakarta
pada 7 Ogos ini.

Dalam rombongan yang berjumlah 40 orang, akan turut serta 5 orang *Amir*, beberapa orang Jeneral
dan penasihat-penasihat baginda.

Dari Jakarta baginda akan berangkat ke Bogor, Bandung, Yogyakarta, Sulu, Surabaya, Padang,
Bukit Tinggi dan Medan. Dari Medan akan kembali ke Jakarta untuk menghadiri perayaan hari
17 Ogos – hari ulang tahun pengisytiharan kemerdekaan Indonesia.

Sehari dua sesudah perayaan itu baginda akan berangkat kembali ke Saudi Arabia.

Diberitakan juga bahawa panitia sambutan di Jakarta sedang sibuk mengurus tempat-tempat penginapan (tempat
tinggal) rombongan di-Raja itu di kota-kota yang akan dilawati. Di Jakarta al-Malik Saud akan menginap
di Istana Negara.

Sementara itu dalam singgahannya di Singapura, baginda akan disambut oleh kaum Islam dengan sepenuh-penuh
kehormatan.

////////////////////////////////////